



Bulteno de la Londona Esperanto-Klubo

<https://londonaesperantoklubo.com>

Marto - aprilo 2023

Kluba programo:

Marto:

- 3. Demenco kaj kohereco. Encarna Teruel.
- 10. Lingva seminario: John Wells (ĉeeste en Highbury).
- 17. Reta vortaro (ReVo), uzado kaj redaktado. Wolfram Diestel.
- 24. Kapti la momenton, plani la estontecon: Esperanto en la jaro 2023. Humphrey Tonkin.
- 31. Jarkunveno de LEK. (ĉeeste en Highbury - membroj vidu akompanantajn dokumentojn).



Aprilo:

- 7. Neniu programo pro Pasko.
- 14. Ĉeesta kunveno en Londono (Highbury).
- 21. Nenia kunveno (pro okazo de Brita Kongreso).
- 28. Sándor Petőfi, montopinto de la poezio – stilo popoleca sed ne nur... Istvan Szabolcs.



Lokoj, horaroj kaj aliaj informoj:

LEK kutime kunvenas vendredvespere. La duan vendredon de ĉiu monato la kunvenoj estas surlokaj kaj okazas en nia renkontiĝejo en Highbury. La renkontiĝoj komenciĝas je la **19.15h** (UTC; UTC+1 post la 26-a de marto 2023). Aliaj surlokaj kunvenoj okazas de tempo al tempo kaj por scii pli pri tiuj, bv. viziti la paĝon 'events' ĉe nia retejo. La ceteraj vendredaj kunvenoj okazas en la interreto per la sistemo Zoom, kun komenc-horo je la **19h** (UTC; UTC+1 post la 26-a de marto 2023). Ĉiuj Klubanoj kaj vizitantoj, proksimaj kaj foraj, povas do ankoraŭ havi la eblon partopreni en la kluba vivo.

Novaj spektuntaj de la interretaj kunvenoj povas peti ligilon al la proksim-vendreda Zoom-renkontiĝo en tiu ĉi paĝo: londonaesperantoklubo.com/zoom.html.

Haveblas ankaŭ, ĉe Jutubo, registraĵoj de prezentoj jam okazintaj. Bonvolu viziti mallonge.net/LEK-jutubo

Letero de la sekretario:



La Londona Esperanto-Fenikso,

Fenikso estis mita birdo, kiu vivis tre longe, poste bruligis sin mem kaj fine renaskiĝis el sia cindro, kaj la ciklo rekomenciĝis. **W. T. Stead**, nia kunfondinto, el la esperantista paradizo, en kiu li iĝis la oficiala eldonanto de la loka bulteno, vidis la londonan klubon dum 120 jaroj plurajn fojojn renaskiĝi kaj adaptiĝi al novaj situacioj. Do por li la eventoj de nia klubo en la lastaj jaroj estas nesurprizaj. La lasta renaskiĝo okazis lastatempe. La londona Esperanto-klubo travivis la pandemian periodon sen perdoj kaj poste trovis novan renkontejon kaj rekomencis siajn ĉeestajn kunvenojn apud la retaj, relanĉis siajn kursojn por komencantoj, debatis pri tio, ĉu ĝi havu *Jarkunvenon* aŭ *Jarkunsidon*, rekomencis siajn novjarajn festojn. Nun ĝi havas paĝaron en la reto, ĉar tion postulas la nova brava mondo, rekreis sian regularon kaj rekomencas siajn jarkunvenojn en la fino de marto. Do, ĉio ŝanĝiĝis por ke nenio ŝanĝiĝu.



Tio, kio ne ŝanĝiĝis estas du aferoj: la sama obstino labori por Esperanto, kiun Zamenhof mem laŭdis en sia saluto en 1903, kaj la manko de londonaj komencantoj, kiuj verdire ja komencas aperi en niaj kursoj kaj kunvenoj sed ankoraŭ en nesufiĉa kvanto. Se Londono havas 9 milionojn da loĝantoj oni devus povi atendi 9 londonajn komencantojn en ĉiu nova kurso; unu je ĉiu miliono da londonanoj. Sed ni ankoraŭ ne sukcesas atingi tion, malgraŭ la komenco de nia informado al la ekstero. Estas vero, sed tion Zamenhof kaj eĉ Stead ne povis antaŭvidi, ke '*vendi*' Esperanton en Londono en la nuna epoko estas kiel vendi glaci-ŝrankojn al la eskimoj en la Norda Poluso. Ĉiu estas konvinkita, ke li jam parolas la internacian lingvon. Sed tamen ni devas akriigi nian kapablon trovi tiujn naŭ londonanojn, kiuj interesiĝas pri lingvoj, pri savo de la mondo, pri internaciaj rilatoj. Kaj en la junularo tiaj homoj ekzistas, kiel la movadoj por haltigi la klimatan katastrofon kaj aliajn similajn katastrofojn montras. Certe nia fenikso kapablos ankaŭ fari tion kaj tiam Stead povos finfine verki la artikolon, kiun li sopiras verki por la paradiza bulteno: "*Londono ne nur vokas sed ankaŭ vekas*".

**Amike
Renato Corsetti**

Ĉu vi jam remembrigiĝis?

Se vi ankoraŭ ne faris, ne forgesu remembrigi al LEK. Ni ĉefe uzas la kotizojn por pagi la kunvenejon, en kiu ni renkontiĝas ĉiumonate, kaj por reklami niajn lingvajn kursojn. Vi povas facile (re)aniĝi pere de la retejo:

londonaesperantoklubo.com/membriĝo.html

Se vi ne povas uzi la retan aliĝilon, bv. peti paperan de la prezidanto, sendante retmesaĝon al anthony@esperanto.org


Nia renkontiĝejo

La surlokaj kunvenoj de LEK okazas unu fojon monate, kutime la 2-an vendredon de ĉiu monato. La venonta kunveno okazos **la 10-an de marto** kaj estos lingva seminario de John Wells. La kunvenejo troviĝas ĉe:

Highbury View, 89 Ronalds Road, London, N5 1XQ
(goo.gl/maps/jNtGf5AcG68ogPrq6).

La ejo estas facile atingebla de la metrostacio *Highbury & Islington*. Temas pri pli-malpli 10-minuta piedirado. Por eniri la ejon, oni bezonas enirkodon. Ĝi estos dissendita per retmesaĝo antaŭ la kunveno. Se vi ne havas aliron al la interreto, bv. kontakti la sekretarion (T. 07399 273515) por havi la kodon se vi intencas ĉeesti. Ekster la enirejo estos afiŝo kun kontaktonumero por tiuj, kiuj hazarde alvenos sen la enirkodo.

Kiel atingi Highbury View: **Metroo:** Highbury & Islington (linio Victoria). **Fervojo:** London Overground (Highbury & Islington) kaj Great Northern (Highbury & Islington aŭ Drayton Park). Autobusoj: 19, 263, 271, 30, 43.



Universala Kongreso ree en Eŭropo

La 108-a Universala Kongreso de Esperanto en 2023 okazos denove en Eŭropo, en la ĉarma nord-itala urbo, Torino. La datoj de la kongreso estos: 29 de julio — 5 de aŭgusto 2023.

Je la dato de la 15-a de februaro, pli ol 800 homoj jam estis aliĝintaj al tiu, kiu promesas esti unu el la plej vervaj mondaj kongresoj de la lastatempaj jaroj.



Ankaŭ vi povas partopreni, viziti belegan urbon, regionon kaj landon, denove ĝui la etoson de Esperantujo kaj la gastemon de la lokanoj. Ne forgesu, se vi aliĝos ĝis antaŭ la fino de la marto vi profitos de pli malaltaj kotizoj. Do, faru nun.

Por aliĝi al la kongreso, bv. viziti la retejon de UEA, ĉe **uk.esperanto.net/2023/**

Ĝis Torino!

Brita Esperanto-kongreso en Kembriĝo

La 103-a brita kongreso okazos en la universita urbo Kembriĝo, de la 21-a ĝis la 23-a de aprilo. La sama urbo gastigis la 3-an Universalan Kongreson en 1907. La kongresejo estos en Lord Ashcroft Building, Anglia Ruskin University.

Venu por uzi vian Esperanton kaj por ĝui la interesajn prelegojn, kunmangadon, ludojn, muzikon kaj aliajn programerojn! Ne maltrafu la okazon viziti Esperantujon en tiu belega urbo. Por ekscii pli da detaloj kaj por la aliĝilo, vizitu **britakongreso.org/**



Londona Esperanto-klubo

Funkciuloj

Honora Prezidanto: Prof. John Wells; Honoraj Vicprezidantoj: Heleno Fantom, Joyce Bunting.

Anthony Bodineau (Prezidanto), Olga Kerziouk (Vicprezidanto), Matt Peperell (Vicprezidanto), Arturo Prent (Kasisto), Renato Corsetti (Sekretario), Terry Page, Anica Page, Antony Rawlinson, Phil Housley, Alexander Ord (konsilantoj).

Maurizio Giacometto (kompilisto de la Bulteno).

